

項城縣志卷十四

麗藻志三

書

報龐惠恭書

魏應場邑人

夫蕭艾之歌發於信宿子衿之思起於甯一則嗣音况實三載能不有懷雖萱草樹背皋蘇在側悒憤不逞祇以增毒朝隱之官賓不往來喬木之下曠不休息抱勞而已足下剖符南面振威千里行人子羽朝夕相繼曾不枉咫尺之路問蓬室之舊過意賜書辭不半紙慰藉輕於繒縞譏望重於邱山是角弓之詩所以為刺也植鷺羽於宛邱騁駿足於株林發明月之輝光照妖人之窈窕斯亦所以眩耳目之視聽亡聲命於知友者也

與陰夏書

魏應璩邑人

從田來見南野之中有徒步之士怪而問之乃知郎君頓有微疴
告祠社神將以祈福聞之悵然以增歎息虛社高樹能有靈應哉

薦和模牋

應 璩

璩聞唐堯因羣士以興治齊桓假衆能以定業是故八元進則太
平之化成六賢用則九合之功立竊見同郡和模字慮則質性純
粹體度貞正履仁蹈義動循軌禮方今海內企踵欣慕捉髮之德
山林投褐思望旌弓之招實英奇敘用之時賢達進致之良秋也
令夜光之璧顯價於和氏之肆千里之足定功於伯樂之庭庶有
以宣明大道光益時化

以上漢魏百
三家集

與侍郎曹長思書

應 璩

璩白足下去後甚相思想叔田有無人之歌閨閣有匪存之思風
人之作豈虛也哉王肅以宿德顯授何曾以後進見拔皆鷹揚虎

視有萬里之望薄援助者不能追參於高妙復斂翼於故枝塊然
獨處有離羣之志汲黯樂在郎署何武恥為宰相千載揆之如其有
由也德非陳平門無結駟之迹學非揚雄堂無好事之客才劣仲
舒無下帷之思家貧孟公無置酒之樂悲風起於閨闥紅塵蔽於
机榻幸有袁生時步玉趾樵蘇不爨清談而已有似周黨之過閔
子夫皮朽者毛落川涸者魚遊春生者繁華秋榮者零悴自然之
數豈有恨哉聊為大弟陳其苦懷耳想還在近故不益言璩白

與廣川長岑文瑜書

應璩

璩白頃者炎旱日更增甚沙磧銷鑠草木焦卷處涼臺而有鬱蒸
之煩浴寒水而有灼爛之慘宇宙雖廣無陰以憇雲漢之詩何以
過此土龍矯首於元寺泥人鶴立於闕里修之厯旬靜無徵効明
勸教之術非致雨之備也知恤下人躬自暴露拜起靈壇勤亦至矣

昔夏禹之解陽盱殷湯之禱桑林言未發而水旋流辭未卒而澤
滂沛今者雲重積而復散雨垂露而復收得無賢聖殊品優劣異
婆割髮宜及膚翦爪宜侵肌乎周征殷而年豐衛伐邢而致雨善
否之應甚於影響未可以為不然也想雅思所未及謹書起予應
璩白

與滿公琰書

應璩

璩白昨者不遺猥見照臨雖昔侯生納顧於夷門毛公受春於逆
旅無以過也外嘉郎君謙下之德內幸碩才見識知己歡欣踴躍
情有無量是以奔騁御僕宣命周求陽書喻於詹何楊倩說於范
武故使鮮魚出於潛淵芳香發自幽巷繁俎綺錯羽爵飛騰牙曠
高徽義渠哀激當此之時仲孺不辭同產之服孟公不顧尚書之
期徒恨晏樂始酣白日傾夕驪駒就駕意不宣展追惟耿介迄于

明發適欲遺書會承來命知諸君子復有漳渠之會夫漳渠西有
伯陽之館北有曠野之望高樹翳朝雲文禽蔽綠水沙場夷敞清
風肅穆是京臺之樂也得無流而不反乎適有事務須自經營不
獲侍坐良增邑邑因白不悉璩白

與從弟君苗君胄書

應璩

璩報聞者北遊喜歡無量登芒濟河曠若發矇風伯掃途雨師灑
道按轡清路周望山野亦既至止酌彼春酒接武茅茨涼過大夏
扶寸有修味踰方丈逍遙陂塘之上吟詠苑柳之下結春芳以崇
佩折若華以翳日弋下高雲之鳥餌出深淵之魚蒲且讚善便嬾
稱妙何其樂哉雖仲尼忘味於虞韶楚人流遯於京臺無以過也
班嗣之書信不虛矣來還京都塊然獨處營宅濱洛困於囂塵思
樂汶上發於寤寐昔伊尹輟耕邳惲投竿思致君於有虞濟蒸人

於塗炭而吾方欲秉耒耜於山陽沈釣繚於丹水知其不如古人
遠矣然山父不貪天地之樂曾參不慕晉楚之富亦其志也前者
邑人念弟無已欲州郡崇禮官師授邑誠美意也歷觀前後來入
軍府至有皓首猶未遇也徒有飢寒駿奔之勞俟河之清人壽幾
何且官無金張之援遊無子孟之資而圖富貴之榮望殊異之寵
是隴西之遊越人之射耳幸賴先君之靈免負擔之勤追蹤丈人
畜雞種黍潛精墳籍立身揚名斯為可矣無或遊言以增邑邑郊
牧之田宜以為意廣開土宇吾將老焉劉杜二生想數往來朱明
之期已復至矣相見在近故不復為書慎自愛璩白

薦韋泓牋

以上昭
明文選
晉應詹邑人

自遭喪亂人士易操至乃任運固窮耿介守節者歎矣伏見議郎
韋泓年三十八字元量執心清沖才識備濟躬耕隴畝不煩人役

靜默居常不豫政事昔年流移來在詹境經寇喪資一身特立祖
禍不掩形菜蔬不充朝而抗志彌厲不遊非類顏回稱不改其樂
泓有其分明公輔亮皇室恢維宇宙四門開闢英彥鳧藻收春華
於京輦採秋實於巖藪而泓抱璞荆山未剖和璧若蒙銓召付以
列曹必能協隆鼎味緝熙庶績者也

與陶侃書

應詹

每憶密計自沔入湘頡頏繾綣齊好斷金子南我東忽然一紀其
閒事故何所不有足下建功嶠南旋鎮舊楚吾承乏幸會來忝此
州圖與足下進共竭節本朝報恩幼主退以申尋平生纏綿舊好
豈悟時不我與長即幽冥永言莫從能不愧悵今神州未夷四方
多難足下年德並隆功名俱盛宜務建洪範雖休勿休至公至平
至謙至順即自天祐之吉無不利人之將死其言也善足下察吾

此誠

以上晉書本傳

答黃載公書

國朝孫奇逢 卷城

知道無所不在則無時無處而非學也喫緊下手工夫只是求於心三月不違庶幾存之之君子日月至焉便不敢輕言不放求放心亦只是去人欲存天理而已一分欲去一分理還欲盡去而理全復矣拳拳服膺而弗失之再勿令其放此復性之功盡人以合天者也顏曾思孟諸大賢以及周程張朱諸大儒其學皆是如此總是以孔子為宗孔子一天也諸賢各分春夏秋冬之一令賢者識其大不賢者識其小莫不有夫子之道焉夫子其敦化之大德餘皆小德之川流即夫婦之與知與能亦不可謂非川流之派衍支分也所謂體用一源殊途同歸者耳若二氏則源各殊而各有所歸固不必強而合之也子歸而靜坐而自己心中識認欲耶理耶

始知此心之放處不少問目不及書姑就其語答之如過保汝當

出以共質

黃氏家藏夏
峯先生墨蹟

與顧可亭比部

閩 潮邑人

春和景淑萬彙欣榮遠挹仁風側聞休暢歲前韓舍親旋里備悉
近祉深愜鄙懷老夫子惓惓遺愛注念學宮碑亭曾捐俸滇南十
有二金徐大尊於去秋九月頒發到項門生等經營旬日始獲落
成雖未極壯麗亦頗渾堅可垂永久經費物料開具清單可核獨
是高天厚地夫子之入人心者久而愈深萊柏召棠項人之思夫
子者曷日能已議建一去思碑於北門道上蓋欲借韓陵片石與
峴山輝映耳然非此無以誌不朽也目今苦無鐵筆善手故需時
日俟功成報聞便羽修候不盡欲言

端操堂
文集

與高恒溪論學

倭 仁

河南
駐防

世兄患獨學無友愚謂只要立起必為聖人之志誠心所孚必有感動信從者固可藉為夾輔之資毀謗者亦可取為磨礪之助無處非學即無人非友德必有鄰患不學不患無友也又學問得力於朋友者最速得力於境地者最實然涵養此心優游饜飫又不如收效於詩書者最深且固又學要踏實做去不可懸空探索只問獨知處欺慊如何日間欺者幾事慊者幾事容不得一毫包謾假借

學貴鞭辟近裏勇往直前克己要實克復禮要實復方不是口頭學問逐人面皮上工夫謝上蔡云克己於性偏難克處克起朱子云克己別無巧法譬如孤軍猝遇強敵惟有舍命向前而已皆至言也我輩今日惟恪守程朱窮理務極其精居敬務極其至窮理則明足以察幾居敬則健足以致決真積力久到得一日克復境

地則足下從前所疑當渙然冰釋矣

恆溪言大學新民當作親惡意讀書當於身心上求實用不在字句上生枝節我輩雖無治民之責妻孥僕隸皆民也我自明其德使家人各明其德此即當前實境為學實功不然言新言親即分析得是亦與己不相干況前人定論功令遵行何必重翻舊案立異說乎

吳竹如曰新民兼教養親之之意自在其中作親字則有養而無教矣

來示誠意乃養性之旨好惡從性善說起竊意識意與養性不同養性是涵泳義理從容饜飮工夫所謂靜以養未發之中也誠意則於心之發處用力好善如好好色惡惡如惡惡臭務決去求必得是一刀兩斷猛勇工夫二者似不相涉好惡雖從性出然卻是情

不是性且此章本無性善之意何須添出所云揜著指視皆發明誠之不可揜亦即是性善合內外之道與大學本旨不合反將此章喫緊為人之意說寬矣又云提醒性真使知行合一非徒以屏除惡意為誠意前二語認心為性仍蹈姚江故轍言提醒此心可矣不可言提醒性真也性豈有真偽乎意與念異念有善惡意則好善而惡惡者也故曰誠其意意惡則誠字解不去矣又云正心章忿懣好樂等項是不好字正須掃除廓清以復心之本體夫忿懣四者乃心之用如何除得聖賢之學豈若釋氏掃空一切使心如枯木死灰耶且朱註明言人不能無何為立異求新與前賢牴牾耶至其引孟子可欲之謂善數句與誠意正心殊覺強合艮止光明尤非充實光輝之謂細繹分條總緣良知之說先入為主不肯虛心玩索經文及朱註或問諸說偶有所見硬自立論故往往

遷就附會不顧理之所安即此可見一心之不足恃而格物致知之功不可缺也

恆溪以好惡在存主處說疑朱註意者心之所發一言劉蕺山曾持此論曰心有主是曰意夫意既為好善惡惡之意其為感物而動明矣又何疑朱子之言乎後儒好在字義上生枝添葉其實與聖賢為學道理無干殊無味也

吳竹如曰此由所見處有病故也

誠意誠字與修正格致一例看是著力字非如中庸誠者天道之誠可以無妄解也

恆溪曰欲仁斯至日新又新上蔡謂聖人是一日一日積的非一些一些積的語似不妄過為刻責反覺重而難舉謹存此俟質

以上

倭文端公遺書

上李文園軍機書

王詵桂邑人

僧邨自去夏至今春數大敗矣掩敗為功蹈諸帥弊朝廷竟信而不疑賊知僧可欺也數小敗以驕之委不甚愛惜之物以餌之降賊為閒告僧曰賊將盡矣僧即奏曰賊將盡矣朝廷亦以為賊將盡矣舉朝欣欣盼紅旗之至詎知僧死期將至哉速召之還此人不死猶可養國家威望也求大將於大將殊難其人籌酌再四仍李雲麟祝壩亭可破格大用耳斯言也即先生見之亦必啞然笑然桂終不肯不言也先生湛深經術正月雨雪震電雨土木冰蒼蒼警戒至再至三當事者悠悠忽忽以天象為不足畏也他日後悔母可及哉僧邨忠勇性生近少其選然來自塞外不諳中原事左右無人全為賊欺朝廷以僧邨必不欺飾也不知僧邨蓋為賊欺也明目達聰是草野所深望耳

勸縣主聯保甲書

王詵桂

竊維土匪肆起由竊而盜由盜而搶其搶衣物錢財牛馬器械等類罪已不赦其搶人閨閣幼女守志孀貞惡更彌天每見被搶之翁姑父母哭泣悲哀告天無路訴地無門有令人言念之而淚下者矣然賊之敢肆橫者良由彌盜之方有未講也

聖祖仁

皇帝聯保甲以弭盜賊其為閭閻計至深切矣無如當今時吏則徒稽戶籍民則徒置門牌其於聯保甲之實久廢而奉行也無怪乎匪類猖狂由竊而盜由盜而搶生恐其滔滔不息終成江河咸豐同治等年皖省豫省兵亂數秋前車不可為後車之鑒乎生亦知不在其位不謀其政然讀聖賢書志切同仇忠義之心勃然而不可遏望祈仁憲勿棄芻蕘將久廢之政實舉而奉行之生願聽其驅使其於聯保甲之法無不盡心竭力而為之也且思聯保聯

甲之義十家為甲揀選壯勇十名各書姓名於冊一人執旗二人
擡礮三人弓矢四人長鎗旗分黑白青黃赤按五方為製各莊置
鼓一面懸於高杆聞警則以擊鼓為號令十家為甲甲派甲長一
甲之事一甲之甲長任之十甲為保保派保正一保之事一保之
保正任之一甲如是甲甲如是一保如是保保如是而專責諸各
村之村長每村訂冊三部村長存一部以書保甲人等姓名冰案
存一部以便仁憲查驗賞罰生等存一部以便省試督催其或某
村有窩匪之家訪查確切甲長稟保正保正稟村長村長稟仁憲
或仁憲率令差役合某村之村長保正人等同往而勒緝之或仁
憲省某村之村長保正人等獨去勒緝亦無不可其所獲者實係
窩家匪類自宜優獎若挾仇妄舉誣言無辜法亦難寬如是實舉
聖諭聯保甲之條而奉行之寓兵於農則內患可除外寇可

禦盜賊息黎庶安倘鄰封聞風而興起焉一縣如是縣縣皆如是則邪慝去而庶民興雖天下亦可平矣仁憲其勿棄焉可

上李文園宗伯書

王詵桂

文園先生大人經案廿載渴思道範一見頓消塵俗雖隅侍匆匆一日遽別而裁雜派感人心二語已徵大儒真經濟然世之人必以為老生常談不肯行也蓋今天下一偽局也偽不去亂不止不待智者而後知也顧欲其去偽也人皆以為迂嗟乎世之趨偽也非一日之積矣科目偽而士氣靡軍政偽而將才渺文武交失亂以大劇於是乎書生談紙上之兵俗吏演官場之話露布空花馬磨陳迹自軍興以來未之能易也師愈潰而餉愈繁賊益多而民益少國困度支民痛首功八表同昏四海如沸惟此團練一策真行堅壁清野猶可收已潰之人心保未殘之疆域而官以偽行